

ХА́НТЫ ЯСА́НЦ



Сохраняем
традиции
в новом
формате

24.12.2020
№ 24 (3564)

Основана
1 ноября 1957 года

Вудаң мойлупсэңән ёша павтӓс



Округ
кэщәев пида
вәйтантайдсүв

» 2

Вән
мойлупсыйн
катлуптӓсы

» 7

Еремей Айпин
нөмуп
лүңтупсы

» 8

Вәлтӓл хүват
пушхӓт пида
рәпитӓс

» 14

«Торум Маа» нөмпи йис пурмайӓт лавӓлды хотн рәпиттӓ хуят, лүңӓттӓ
арӓт хӓнштӓ хӓнтӓ хӓ Вячеслав Кондин. Г.Кондина верум хур



Вудан кәщәев пида вәйтантийдсүв

Югра мўев 90 ол ёманхәтл постәты едпийн, Ас потты тыдәщ 9-мит хәтәдн округ мўв губернатор ими Наталья Комарова округев хўваттын айкеләт дәщәтты ёх вәйтантупсыя әктылдәс, дәдн вошәтн па кәртәтн мир иньщәсупсәта юхды яснәт лупты.



▲ Округ кәщә не Н.В. Комарова. admhntao.ru эвәлт вўюм хур

Тәм пўш кәщә нецев пида путәр йилуп щирн, интернет хўват мәнәс. Вантә, йилуп коронавирус мәш пурайн онлайн щирн рәпитты питсүв, сыр-сыр мирхотәт, вәйтантупсәт, вәндтәты хәрәт, ванлтупсәт па па мосты верәт интернет хўват дәщәтлдыйт.

Мирхотн арсыр мосты верәт оләңән путәртсы. Щит йилуп пельницәйт омәсты па пўншты верәт, вәндтәты па айлат ёх верәт, карты өхәдн йәңхты-мәнты өшәт, өрацты па па хон пеләк мўвәт ёх пида ям верәт тәты щирәт па па утәт оләңән кәщәев эвәлт иньщәссүв.

Губернаторев пида вәйтантийдты па дўв эвәлтада арсыр верәт оләңән иньщәсты пәта айкел дәщәтты 71 тәхи дәнхас. Щит айкел дәщәтты 101 тәхи федеральной па па хон пеләк

мўвтел мўвәт: Китай, Сирия, Замбия па СНГ эвәлт айт тәты неңәт па хәйт округ кәщә пида путәртты веритсәт.

Мет вудан иньщәсупсы – щит COVID-19 немуп пәлтап мәш эвәлт ямәлды па лекщитты щирәт оләңән вәс. Щәлта хотәт омәсты вер оләңән ици путәртсы. Тәмхәтл вәнты итәх тәхийн мир балок хуца вәлдәт. Округ кәщәев партәс, дәдн тәм нўша вер сорәшәк йилпа па тәса нух ат вантса па балок хуца вәлты-холты ёх тәм ванән йилуп хотәта касәлды.

Елды мир ямәлды па лекщитты йилуп тәхет омәсты щирәт оләңән путәр мәнәс. Иньщәссы, Горноправдинск па Нижневартовск йилуп пельницәйиңән хән пўншлдиңән? Юхды губернатор лупәс, хуцы 2021-мит одн щитиңән дәщәтлдиңән па пўншлдиңән.

Елды айлат ёх па вәндтәты верәт оләңән

путәр мәнәс. Югра мўв губернаторев ястәс, хуцы интәм әнтә тәп йилуп әшколайт омәсты щира, техникумәтн, колледжәтн вәндтәты вера ици ар өр пунты питды. Щиты вәндтәты вер пәта немасыя щўңкәт па па утәт дәтты, нумсән вәндтәты ёх кәншты питды. Кәщәев нумәсн, тәта вәндтум айлат ёх дәдн яма ат вәсәт, хуцы дыв пириум рәпатаел елды вәлупсийн иса мосты питл.

Ма Наталья Владимировна эвәлт иньщәсум, Югорской государственной университет хуца ясән пида рәпата йилпатды муй әнтә? Вантә, сыры оләтн, Югорской университетн хәнты, вухаль па финно-угорской мирәт яснәта па литература верәта вәндтәйлты хуята йиты тәхи рәпитәс. Щәта ям арат шуши айлат ёхлүв вәндтәты па непекәңа йиты щир тәйисәт. Интәм нюр немәлт әнтәм.

Юхды кәщәев ястәс, хуцы Югорской государственной университет вәндтәты верәт тәты тәхия луңман вәл.

Дыв поступсәл щирн, айлат эвет-пухәт шуши мир яснәта өра парты ән рәхл. Тәм йисн айлат ёх ән термәләләт йис верәт тәса вәты хуята вәндтәйлды.

Щи тумпи ЮГУ хуца бакалавриат хуята

вәндтәты тәхи пўншы, щәта финно-угорской верәт оләңән ясән тәләт. Щәлта юхи хәщум оләтн университетн гумани-тарной институт пўншысы, кәщәя щив хәнты мир учёной не Софья Онина пирысы.

Тәмхәтл рәт ясән па культура верәт вәндтәты пәта университетн тәп сот мулдас щос мәлы. Рәт ясән арсыр факультәт эвәлт нывремәт вәндтәйлдыт. Щәта Софья Онина – хәнты ясән, Светлана Динисламова вухаль ясән тәлнән, Татьяна Молданова история па культура верәт оләңән айлат ёха путәртгәл.

Аспирантура хуцы рәт яснәт әхтыин вәндтәйлды пәта интәм шимл шуши хуят вәл. Щит щи хуятәт, хуятат сыры оләтн вән непекәңа йисәт.

Елды Сәрханл вош пўңәдн Ас юхан мухты хәхләп омәсты пиньщәсы муй әнтә? Уша йис, Ас юхан мухты хәхләп омәсты вера муйсәр непекәт мосләт, щитәт иса тәса дәщәтман вәлдәт. 40 процент арат Югра мўв бюджет эвәлт, 60 процент – Федеральной бюджет эвәлт есәлды. Тәлаңтелн щит 44 верста хўват Ас юхан мухты хәхләп тывл.

Путәр хәншәс:
Ирина Самсонова



Мосты летут па пурмасат тэсыйт

Лўн, сўс пурайн Нижневартговской районан дыв саттэда вер тайты ёх ай кэртата мет мосты летут па пурмасат тэсат.

Нижневартговской Район агропромышленной верат тэты кэща не Г.В. Власова лупас, лўн па сўс пурайн «Корлики» немпи тахи ёх 429,8 тонна арат мосты летут па пурмасат Корлики, Сосновой Бор,

Ларьяк кэртата тэсат, щит эвэлт Корлики воша 347,8 тонна арат летут па пурмасат йил.

Ши тумпи «Газпром-нефть – Региональные продажи» немпи тахи ёх Корлики кэрта 120 тонна арат бензин па 10

тонна арат дизельной утат тэсат.

«Корлики» тахи ёх тумпи мосты летут па пурмасат Ларьяк па Чехломей кэртанна па шураас хуятат иши тэлат. Ларьяк кэртан 7 щимаш тахи, Чехломей – и тахи

ёх ол мэр мосты летут па пурмасат тэлат.

Мосл лупты, хуты Нижневартговской район Варьеган, Аган, Ваховск па Охтеурье кэртатн машинайт янхты ёш вэл, щирн дыв саттэда вер тайты ёх лапат мэр 2-3 пўш мосты утаттэты веритлат.

Людмила Теткина
ханшум айкел
ханты ясаңа тулмаштас:
Людмила Гурьева

Округ мир вухн нётлдыйт

Ас потты тылащ 19-мит хатлан «Югра» немпи айкелат акатты хотн видеоконференция вэс. Департамент кэща не Тереза Анатольевна Пономарева путартас, муйсар верат там ол мэр социальной верат тэты департамент лэщатас, муйсар верат па олн верты питлат.

Кэща не путартас, муйсар нётупсы верат там ол мэр лэщатас, мата ёха там ол мэр нётсат. Социальной верат тэты департамент Россия луваттын вэлты верат лэщатман рэпитл, ши киньща па юкан нумас тайл сыр-сыр йилуп верат лэщатты, нўшая муй па лаварта вэлты ёха нётты.

Россия луват верат лэщатман вухн нётлат нўшая вэлты нявреман мира, мата ёх 3-7 луват няврем тайлат. 2020-мит олн вух сухуптасат олан няврем па хэлмит няврем сема питум паата. Па ши мира, мата ёх нўшая-лаварта вэллат. Ар няврем тайты мира хўвша мэр эвэлт Югорской семейной капитал немуп вух сухуптады, щит 150 шураас, щалта па ашкола па институт нявремата янхты понт вух сухуптады. Ши киньща там олн нумас пунсат па рўтыщаты тахия янхты

понт вух сухуптаты паата вух вейтты.

Няврем мўн мўвевн ки сема питас, аңкелашелла 20 шураас шойт вух мойлады, хураман карты хушапа пунман.

Вэна ювум мира там департамент па нётл. Ан рэпитты пенсияя питум ханнехэя 3 шураас шойт вух сухуптасат, щалта па телевизор вантты карты шэпат лэтты паата вухан па масыйт.

Мўн мўвевн там департамент мэшаң ёха па нётл, щит немасыя вэн хотат вэллат, мата тахийн и тылащ муй па и ол мэр вэлты пиш вэл. Ши мэр мэшаң ёх муйсар вера вэндталыйт, ши юпийн дыв елды пакты кемелн рэпитты питлат.

Тереза Анатольевна ясаң щирн, там лаварт атум мэш олн дыв йилуп сыра рэпитты питсат. Тата рэпитты ёх нётупсы мет мосл мэша ювум ханнехуята, дывела ши

атум мэша ювум ёх пила рэпитты мосл.

30-кем шураас пирща ювум ёха, ар няврем тайты хуятата мосл пуртэн па леты утат орты па тэты. Там тахийн яма нётлат волонтерат. 18 шураас ханнехэя лаварт нумаслад яма лэщатты паата нётупсы мосл.

Вэщ тылащ вўш эвэлт Контакт-центр рэпитл, щалта карты пун мухты мулты верат олан иньщасты пиш вэл. Карты пун номерал – 8 800301 4 43. Кашаң ханнехэ тыв звонитты пакл па сыр-сыр верат олан иньщасты пишл вэл.

Там атум мэш мэрван иса 5 сыр йилуп сухуптаты вер тывас. Ар нявреман мира 35 шураас шойт вух сухуптасат. Щалта нётты вух нўшая вэлты мира, няврем лавалты имиета, ашкола 11 класс етшуптум нявремата сухуптасы.

Щалта Тереза Ана-

тольевна лўв департаментал оланан вэн кэща ёх лупум ям ясаң лупас. Югорской семейной капитал немуп вер «топ-10» мет ям верат кўтн вэл, тата ишакайт, муй вўрн вух сухуптады па муй тахия ши вухат манлат. Мира нётты тахет кўтн мўн Югра мўвев мет олан тахийн вэл, муй вўрн дыв тащан ёх пила рэпитлат. Иса 175 тащан ёх там верата нётлат, дыв леты утн, пурмасн, пуртэнан па сыр-сыр вератн 12 шураас ханнехэя нётлат.

Югра хуца тывум ветсыр вер лўнатлайт мет нумсаң верата. Агентства стратегических инициатив щирн тамаш проектат «Услуга без чиновника», «7 новых идей по борьбе с бедностью» мет ямат, иса Россия луваттын ши верат лэщатты мосл.

Путар ханшас:
Пётр Молданов



Ай көртәт хұват яңхләт



▲ Н. Ташланов



▲ Шимәщ машинайн тохтурәт округ хұват яңхләт. П. Молданов верум хурһән

Мўң Югра мўевн тәл тәрумн вера ищки, дўңән па вера йиңкең, щит дорәт, хәрәт. Кев ёш ки әнтәм, машинайн яңхты пищ иса әнтәм. Тәм дорәт муй па хәрәт күтн, ай вошәтн, ай көртәтн йистелдн ар мир вәл.

Щи ёхиши мәшит-ты вер тайләт, дывела иши леккәр нётупсы мосл. Щи хуя-тата нётты пәта «Центр профессиональной патологии» немуп тәхийн рәпитты леккәр ёх нумәс версәт, муй вўрн ши көртәта яңхты, муй вўрн хўв мўвн вәлты мәша ювум ёха нётты, муй вўрн ши хўв тәхета мәшәт уша верты пурмәсәт па сыр-сыр утәт тәты.

Тәлдн Асәв потты юпийн дыв тәл әшәт хұват немасыя вән машинаятн, дўңән па «Николай Пирогов» немуп тўтәң хопн яңхләт.

Ар од мәр тәмиты рәпитман леккәр ёх ар пўш әш күтн ёрмийдсәт. Тәл тәрумн, ищки муй па вотас хәтләтн кашәнтехника ши әшәт хұват яңхты әнт пәкәл. Хўв, вән машинайт ващ әшәтн ёрумты вер тайләт, доньщ күтн, әпләк күтн керләты пищел иса әнтәм. Щи пәта «Центр профпатологии» хуца

рәпитты ёх нумәс версәт мўң мўевн яңхты пәта нюр йилуп машина верты. Ващ әшәтн ат яңхәл, әпләк күтн ал ёрмәл, ши нумәсәл не-пек вўша тәсәл. Щи непек машинайт верты Саратов воша ЗАО «Радиянт» хуца тәсәл. Щәта рәпитты ёх тәм непека вантман йилуп машина версәт.

Щиты ши мўң округ хуца нюр тәм мўва мосты машинайт юхәтсәт. Тәм машинайт хуца иса верәт яма ләщәтсайт, тәм техника давәрт әш хұват яма яңхәл, па сыр-сыр леккәра мосты хот йитәт, мосты пурмәсәт тайл. Щи пурмәсәт хот йитәт лыпийн така омсәлтуман версайт.

Касәлты щира ләщәтум леккәр хотәт – щит кәт вән машинайһән, анас иты яха кәртәщман яңхләһән. Профпатология центр вән

тохтур ики Николай Ташланов путәртәс:

» *Тәм каслуптуман тайты леккәр хотәв кәт грузовик тайл, хәлүм тосн ши машина верман, ши тосәт хуца па хәлүм пиләң кусәң кўрәт тайл, иса хәт кўр. Щәлдта па дўвела яма мәстүптум анас юкан хот па тайл. Тәм машина тайты хот йитәтн па анасән вәлты хот йитәтн сыр-сыр леккәр пурмәсәт вәлдәт, иса лапәт щимәщ хот йит.*

Касәлты щира ләщәтум леккәр хотәт тайләт рентген пурмәс, есум хир хура вўты карты пурмәс, УЗИ верты хот йит, имет вантты хот йит, лабораторияйт.

Н. Ташланов лупум ясаһән, леккәр ёх вера яма рәпитләт, пурмәсәл така шавиман тайләлал. Муйсәр леккәр пурмәс ай воша мосл, щит дыв көрт эвәлт юхтум непек

мухты уша вердәл. Ай вошн вәлты кәща ёх хәншләт, муй дывела мосл. Щив мәнтыйн мосты леккәр пурмәс пәнән ши вўләт, мосты тохтурәт щив мәнләт.

Касәлты щира ләщәтум леккәр хотәт иса тәхетн яңхләт, дўвел арум тәрум әнтәм, лавәрт әш әнтәм. Воша юхәттәлдн леккәр хот йитәт хуца сора леккәр пурмәсәт ләщәтлайт, мәнты ки сонтумәләт, сора ши хот йитәт пурмәс похлә яма әкәтлайт па пурмәс шавиман елды мәнләт. Тәм хот йитәт лыпийн хошум па тўтәң нуви, мәшәң ёха ям, тохтурәта рәпитты әмәщ.

Кәща вән тохтур ясаһән, тәм пурмәсәң хот йитәт, па щәта рәпитты тохтурәт ин яма ләщәтйидман вәлдәт, Асәв поттийн елды ши сонтумәләт, касәлман көртәт хұват мәнләт.

Путәр хәншәс:
Пётр Молданов

www.khanty-yasang.ru



Конда мўв вәлупсы

Мўн Югра мўевн вошәт күтн йнхты щира ар карты әш әнтәм. Итәх вошәта тәп тәл мәра верәнтты әшәт хўват путләты пищ вәл. Щәлта йиңк тыйн, мўв тыйн вәлты ай вошәта рәхл тәп тухлән хопн йнхты.

Емвош округ Конда мўвн Алтай, Болчары, Ильичёвка, Кама, Карым, Кондинское, Луговой, Никулкина, Старый Катыш па Шугур вошәт күтн лўнән юхан хўват тўтән хоп йнхәл, тәдн ши кәртәтн вәлты мир тухлән хопн тәгыялыйт. Щәлта Супра, Ильичёвка, Никулкина, Сотник, Старый Катыш ай кәртәтн лапка әнтәм. Ши пәта тыв дөтут ән тәгыяды. Вантә, тәм кәртәтн немл хуят ән вәл, тәп лўн па сўс пурайн тыв әх юхтыйлдәт.

Конда мўв луваттыйн карты әш әнтәм, ши пәта вошәта дөтут па пурмәс лыпәт хойты па васы мәнты тыдәщән пурайн 2020-мит одн юхан хўват тўтән хопн па тухлән хопн тәсы.

Ашкола хотәт, ай әвет, пухәт хәтл мәр тайты тәхет, пәльницайт па кўлуп хотәт тәл кеша дәщәтман вәлдәт. Бензин, соляра па кев лавәң вошәтн хотәт хошмәлты кеша ищи лўн мәр тўтән хопәтн мосты арап тәсы.

Щәлта мир Конда мўвн тәдәна па йма вәлдәт. Йилуп корона-вирус мәшн шимл хәннехә мәшитл. Тәм дәвәрт турәх мәш елды ән мәнтәл кеша Кондинской районән оперативной штаб тәхи дәщәтса.

Дыв щиты рәпитләт, дәдн йилуп корона-вирусной мәшн Конда

мўв мир ал мәшитсәт. Ши кеша дыв тәмәшч верәт дәщәтләт:

◆ Газетайт, теле-видения па радио мухты дыв мира путәртләт, муй вўрн коронавирус атум мәша ән йиты па муй ши кеша верты мосл;

◆ Атум мәш елды ән хәнтәл пәта мир вәлты хотәтн подьезд тәхет, ашкола хотәт, ай әвет, пухәт хәтл мәр тайты тәхет, пәльницайт па кўлуп хотәт немасыя дезинфицирующий утн нердайт;

◆ Атум мәша йовум әх вантман тайлдайт, дәдн дыв эвәлтәдәлә мәш тәдән хуятәта ал хәнхәл;

◆ Хәннехә нумсәл йма йиты пәта телефон доверия рәпитл;

◆ Полиция, Роспотребнадзор па оса тәхетн рәпитты әх вантман тайлдәт, дәдн мир немасыя сух венша ат дәмәтләт, ешдәл ванкўтлы люхитман ат тайлдәт, ар мира йха әктәщийлды ән рәхл;

◆ Дөтутәт, пуртәнәт тын нух алумты ән рәхл, ши вер әхтыйн вантман вәлдәт;

◆ Волонтәр әх мира нөтман рәпитләт;

◆ Дыв рутәдә шура-дәты хуятәт муниципальной поступсәт унтасн тәм дәвәрт мәш вәлты пурайн вухн нөт-дайт;



Кондинской район пәльница. ugra.aif.ru эвәлт вўюм хур

◆ Итәх хуятәт юлта рәпитты питсәт.

Кондинской районән рәпитты хуятәт кашәң хәтл пуртәнәт артащман тайдәләл, дәдн мосты ут иса аптека хотн ат вәс. Итәх пурайн Конда мўв пуртән тыныты тәхетн мосты ут әнтәм, тәп щимәшч верәт имухты дәщәтләйт. Ин пуртәнәт аптека хотәта Конда мўвн и лапәт мәр кәт пўш тәгыялыйт.

Ши тумпи Кондинской район луваттыйн, щит Лиственичный, Ягодный, Шугур, Ямки, Юмас, Алтай, Дальний па Кама ай кәртән ФАП тәхет рәпитләт. Мосл лупты, Алтай вошн ФАП тәхия пеңк лекщитты тохтур 0,5 щирн рәпәтая мосл. Щәлта Алтай, Шугур, Юмас вошәтн мир ймәлдәты щира ай тохтур кәншләт.

Конда мўв лапкайтн па пуртән тыныты хотәтн мир тәрумты кем венша ләмәтты сух па вет дўйп посәт па антисептик утәт вәлдәт.

Венша ләмәтты и сух тынд 15 шойт вуха хойл, вет дўйп пос – хәс шойт вух па антисептик тын 30 шойт вух.

Щәлта Конда мўвн 12 вош интернетн верман вәлдәт. Ши тумпи IT-стойбище вер мухты васы мәнты тыдәщн Карым ай кәрт интернетәна йис. Шугур воша ищи 2021-мит одн интернет верлўв.

Кондинской мўв кәча әх китум айкел хәнты ясаңа тулмащтәс:

Ульяна Вәлла



Коронавирус йилуп кәши олаңан

Тәм ванән мўң редакцияев эвәлт округ ймәлты верәт тәты департамент кәща хә А.А. Добровольский коронавирус йилуп мәш олаңан иньщәссүв. Щи департамент кәщайт юхлы ясаң китсәт.

Интәм округев хұват-
тыйн 39 283 хәннехә
COVID-19 мәшн мәшит-
ләт, дыв эвәлтәда шуши
хуятәт ищи вәлдәт, тәп
ин ән хәншды, мәта мир
эвәлт мәшәң хәннехә,
щирн ән вәлы, муйкем
арат хәнты, вухаль па
юрн мир кәшитләт.

Югра мўвн 52 кәртән
шуши мир вәлдәт. Шуши
мир мәшәң әх тухләң
хопн Нягань вошәң
«Центр медицины ката-
строф» тәхия па округ
пәльница тәдыт.

Округев хұваттыйн
пәльницайтн мәшәң
әх лекшитты пәта 4
щурәскем нуры ләщәт-
ман вәд. Нуви сәңхум
вошәң пәльницайн 55
нуры ләщәтсы.

Россия мўвев мир
ймәлты министерства
поступсы хұват корона-
вирус мәшн мәшитты
әх пәльницайт хуща ху-
дыева тәрум пәта лек-
шитдыт.

Интәм Россия мўвев
Минздравсоцразвитие
министерства поступсы
щирн ай кәртән ай
тохтурәт ищи веритләт
мәшәң әх лекшитты,
дыв немасья щи вера
вәндтыйлсәт.

**Россия правительства
кәщайт поступсы щирн
щи мәш лекшитты тох-
турәт аршәк тыләщ вух
әша холумтты питсәт,
вантэ, щиты рәпитман
дыв ищи щи давәрт
мәшн хойты веритдыт.**

ВЭЯТН ЩИ ОЛАҢАН

*Йилуп коронавирус мәш ән хойты пәта мосл:
– ванкүтды хәс секунда мәрлуныщәхн ешлюхәтты;
– люхәтты щирн ән тәйләтыки, немасья салфеткайн
ванкутды еш мәнхты мосл;
– ким етты пурайн, дапкайн, автобусн па па тәхетн
иса венш сух щәшкан тәйты мосл. Кашәң 2-3 шос
йөпийн щит пеләтты мосл;
– вәна пелка ювум әха ән рәхл хулт пела яңхты,
вантэ, дыв хронической мәшәт тәйләт, щирн
имухты щи мәшн хойты веритдыт.*

Тәм путәр хәншмем
пурайн, щит ван хәтлуп
тыләщ 23-мит хәтл вәс,
мўң уша версәв, хуты
юхи хәщум ат-хәтл мәр
округев хұваттыйн 219
хуят щи мәшн хойсы.

Ийха лўнәтты ки,
1 141 902 хуят анализәт
мәсәт, ләдн уша верты,
мәшитләт муй әнтә.

Артәләты әх уша

версәт, мәта луват хән-
нехуятәт мәшитләт. Уша
йис, 0-17 ол луват – 29
хуят, 18-29 ол луват – 17
хуят, 30-49 ол луват – 78
хуят, 50-64 ол луват –
61 хуят, 65 ол луват вўш
эвәлт – 34 хуят.

Путәр хәншәс:

Людмила Гурьева

Давәрт мәш эвәлт пуртән

Ёмвошн вән тохтурәт айкел хәншты әх пида вәйтантыйлсәт.
Дыв ай павәтсәт, муй вўрн йилуп коронавирусной мәш эвәлт
вакцина верты питла.

Югра мўвн мир лек-
шитты верәт тәты кәща
ики А. Добровольский
лупәс:

» Тәм ванән Ёмвош
округа и щурәс 300
вакцина тәсы па 707
хәннехә щи утн вер-
сайт. Ин вакцина Ниж-
невартонск, Сәрханл,
Нефтеюганск па Ём-
вош пәльницайтн ми-
ра омсәлдайт. Еша вәд-
ман вакцина Ёмвош
округ кашәң района па
воша тәды. Мет сыры
тохтурәта, нявремәт
пида рәпитты хуятәта,

социальной верәт әх-
тыйн мир пида кәпәрт-
ты хәннехәйтә пуртән
верла. Щәлта щи пуртән
турәх, сәм, сахарной
диабет мәшәт тәйты
хуятәта омсәлда. Щи
йөпийн полиция вер-
рәтн па кашәң хәтл мир
пида рәпитты әх, арсыр
тәхетн вәндтыйлты
айдат әх вакцинайн
вердайт. Айдтыева 18
ол киньша вәна ювум
кашәң хуят вакцина
пуртәнән омсәлда. Щи
кўтн вакцина верты муй
ән верты, щи олаңан
хәннехә лўв рута нәмәсл.

Ёмвош округ пәль-
ница кәща не Е. Кутефа
ясаң эвәлт уша йис,
вакцина верты щира
дыв яма ләщәтыйл-
сәт. Щимәщ ут верты
елпийн кашәң хәннехә
пида тохтур путәртәл.
Щәлта мәта хуят кәдәдн
антитела немуп ут тәйл
ки, щирн әхәтшәк ва-
кцина верты мосл.

Елды Ёмвошәң тохтур
не С. Гасанова ай пав-
тәс:

» Тәм вакцина кәт
пўш верты мосл. Сыры
олаң ут верла, па 21 хәтл

мәнты йөпийн кимәт
ут омсәлда. Щәлта 42
хәтл вәдты йөпийн тох-
турәт вантләт, муй
иты хәннехә лыпи па
кәды рәпитл. Мет олаң
кәт тыләщ юхлы Юг-
ра мўвн вакцина ве-
рум 15 хәннехә ин мўң
вантман тәйләлўв, ху-
тыса дыв вәлдәт. Мосл
лупты, дыв ән мәшит-
ләт, иммунитетәл йм.
Вакцина дыведа яма
мәстәс.

Щи тумпи тәм вәй-
тантупсыйн уша йис,
Югра мўвн вәдты мир
2021-мит олдн айдтыева
хулыева вакцинайн вер-
ты питлайт.

Путәр хәншәс:

Ульяна Данило



ВЭН МОЙДУПСЫЙН КАТЛУПТАСЫ

Лұв Нуви сәнхум районан мир пириум депутата ар ол мәр вэл, нявремәт пида рәпитты хошл. Ши тумпи лұв аңки, кәт пух енмәлтәс, ин щация йис. Щимәщ каркам хәннехә Клавдия Николаевна Канева (эви опращ немл Молданова) Амня вошн вәл. Тәм ванән Клавдия Николаевна ар ол мәр нявремәт пида рәпиттал пәта «Почётный работник воспитания и просвещения Российской Федерации» нем ёша павтәс.

Вантә, кашәң хән-нехә вәлтад са имухты хән хәя-воя йил. Клавдия Николаевна ар нявремәң Молтан ёх хотн сема питәс па енмәс. Худна айлата вәдмалн лұв аңкиды хәщәс. Лұв киньшала ай апәлыдал иса вұруман тәйсәлэ, елды вәндтыйдты нәт-сәлэ. Ащел Николай Кузьмич Молданов ар ол мәр Касум совхозн вұды тащәт давәдман рәпитәс. Лұв ям нумсуп хәннехә вәс. Эвең хот, пухәң хот енмәлтәс.

Клавдия Молданова Амня вошн ашкола етшуптумал юпийн Ём-вош педучилище хуща нявремәтвәндтәтынеңа йис. Ши юпийн енмум мұвда июхды юхтәс па Амня вош ашколайн ай нявремәт вәндтуман рәпитл. Щәлта 2004-мит ол вұш эвәлт Касум ашкола кәшәләңкәр неңа вәл. Лұв иса 31 ол мәр айлат ёх пида рәпитл. Ши арат ол рәпитмал мәр Касум вәнтар ар эви па пух вәндтәс. Ши тумпи лұв 1996-мит одн Екатеринбург вошн университет етшуптәс.

Лұв рәпатайлн арсыр йилуп верәт ләщәтл. Вәндтәты нявремлад сыр-сыр кәсупсәтн кәс-ләт. Район луваттыйн дыв ар пұш нух питыйд-сәт. Щиты 2018-мит одн «Большая перемена», «Каркам ёшиет», «Дорог много – моя одна!», «Твой дом» немпи кәсупсәтн дыв нух питсәт.



Амня вош интернатн вәлты нявремәт. Е. Молданова верум хур

Щәлта 2019-мит па 2020-мит олатн Касум мұв эвет па пухәт Клавдия Николаевна унтасн ищи ар тәхетн кәсләт. Ши тумпи Амня вош ашколайн нявремәт хәрция рәпитты волонтер вер 2011-мит ол вұш эвәлт тәлдэ. Лұв тыв айлат ёх хушләлэ, ләдн дыв каркама ат рәпитсәт. Лыв яха пәльница хот пұңәлн хәл юхәт омсәлсәт. Щәлта Амня вош хұлэт нявремәт пида сыстамтләт. Ши тумпи вошел пұңәлн вәнтәт, юханәт вантыйдман тәйләт, ләдн немәлт хуят леваса нампар ән вушкәс.

Клавдия Николаевна нявремәт пида кәпәртты ёх рәпата вантыйдман тәйл, ләдн интернатн вәлты эвет па пухәт яма ат вәсәт па вәндтыйдсәт. Вантә, интәм йилуп вәдупсыйн ай ёх вәндтәты давәрта йис. Няврем вәндтәты вер тәса па яма мәнты пәта лұв эвет, пухәт

пида вешкат нумәсн па ләхсәңа вәл. Вантә, ши пурайн пушхиет вәндтәты хәннехәя эвәлты питләт па вәдупсы ям ёш холумләт.

Мосл лупты, Амня вошн вәндтыйдты па ашкола етшум нявремәт вәндтәты неңел сәмәңа тәйләл. Молтан не эвет, пухәт пида 31 ол рәпитман уша верәс, төп нявремәт пида яма пұтәртман тывл дывты тәса вәндтәты.

Клавдия Николаевна вәндтәты нявремәт арсыр кәсупсәтн әрәщләт, сыр-сыр лұңтупсәтн ләщәтум непекләл ванл-тәләт, ёмәңхәтләтн ари-ләт па якләт.

Ван хәтлуп тыләщ 28-мит хәтәлн Клавдия Николаевна сема питум хәтләл. Мұң, «Хәнты ясәң» газетайн рәпитты ёх, нәңена вән вұща ясәң китлұв! Ешәк Клавдия



К.Н. Канева

Николаевна! Нәң сема питум хәтләна дәңхәл-лұв лупты:

» Уяна, пишаңа ар ол нәң вәда. Енмум мұвиенән, Ёмәң Касум Най омәсты мұвенән-йиңкиенән елды шәшты әрән ат мәлдыйн! Хұв йис, хұв нәпәт тынәң хәннехуятэв!

Путәр хәншәс:
Ульяна Молданова



Еремей Айпин немуп лўңтупсы

2020-мит ол Ас потты тылащ 19-21-мит хатлатн Уньюган вошаң Е.Д. Айпин немуп киникайт лўңатты хотн «Айпинские чтения» немпи II –мит научно-практической вэйтантупсы мәнәс.

Тәм лўңтупсы ханты мир писатель, оса верәт тәты хәннехә, Россия мўв луваттын писателят тахия лўңты хуят, Югра мўв культура верәт әхтын заслуженный рәпатнек, Ёмвош округ шуши мир Ассамблея кәща хә Еремей Айпин хәншум путрәт, лўңатты арәт па яснәт пәта кимит пўш ләщәтды. Тәм олн мирхот интернет хуца онлайн ширн вәс.

Щит Ёмвош, Сәрханл, Москва, Нижневартовск, Донецк (Украина мўв) па Уньюган вошәт эвәлт үчәнойт, культура па вәндтәты верәт тәты ёх, киникайт лўңатты хотәт па йис пурмәсәт әкәтты па шавиман тәйты тәхет рәпатнекәт, оса верәт тәты неңәт-хәйт па округ кәща тәхет ёх.

Ияха әкташум ёх күтәдн хәнты мир писатель ики хәншум лўңатты арәт олаңан, муй ширн Югра мўв әшколайтн нявремәт Е.Д. Айпин хәншум путрәт лўңатләт па вәндтәләт, хутыса писатель хә киникайт хўват хәннехә нумсәңа па мутрая йил па па верәт олаңан путәртсәт.

Мосл ястәты, Уньюган кәртән Е.Д.Айпин немуп хоттел, ёхәң киникайт лўңатты тахи йилуп хота касдәс. Щит пәта лўңтупсы тумпийн ияха әктәшум непекәң хуятәт тәм амтәң вер постәсәт. Лыв онлайн ширн киникайт лўңатты хот

йма нўх ванлтәсәт.

«Айпинские чтения» немпи II –мит научно-практической вэйтантупсы Ас-угорской институт рәпатнекәтләщәтты нәтсәт. Мет апрәна филологической наукайт кандидат, литература верәт әхтын научной рәпатнек В.Л. Сязи па педагогической наукайт доктор па профессор ики А.Н. Семёнов вәсәңн. Лын хәнты мир писатель ики Е.Д. Айпин хәншум путрәт ймсыева нух вантсәңән па щитәт хўват айкел тәсәңн. В.Л. Сязи путәртәс, муй ширн Еремей Айпин Аңки хурас путрәтн ванлтәл. А.Н. Семёнов ай тәс, хутыса хәнты мир писатель хәншум лўңатты арәт хўват нәмәсты вер олаңан уша верты рәхл.

Олаңмит «Айпинские чтения» немпи лўңтупсы 2018-мит ол вәйт лор тылащ 28-29-мит хәтләнәнән вәс. Щи пурайн тәм кәртые немасыя пирисы, вантә, тәта вәдты киникайт лўңатты хот Е.Д. Айпин нем тәйл.

Тәм ванән Югра мўв губернатор премия ширн литература верн «Художественная проза» немн Е.Д. Айпин хәншум «В поисках Первоземли» немпи роман нух питәс.

» Тәм мойлупсы ёша катлуптәты шеңк амтәң. Вантә, йм, хуты мўн Россия мўвев ёх тә-



^ Е.Д. Айпин



^ Лўңтупсы пурайн

са вәдәт, хуты хәншум путрем хўват хәннехә нумсәна, мутрайна йил па кашәң хәтл вәндтәл, ләдн арсыр йилуп, әмәщ па мосты верәт олаңан уша павәтты, – хәнты мир писатель ики лупәс.

Мосл ястәты, хуты Югра мўв губернатор литература верәт әхтын немпи премия мойләты вер кашәң ол ләщәтды. Щи едлийн писателят, поэтәт па айт тәты ёх эвәлт пириум арталәты ёх мет әмәщ па нумсәңа путрәт, лўңатты арәт хәншты хуятәт киникайт

йма нух ванлтәт па мет мосты непек пириләт. Едлы округ кәща не литература верн нўх питум хәннехә вулаң мойлупсийн мойләллә.

Тәм мойлупсы няд вер хўват ёша павәтты рәхл. Щит «художественная проза», «поэзия», «документальная», «публицистическая», «литературоведческая», «научно-популярная литература» па «детская литература».

Путәр хәншәс:
Ирина Самсонова



Сам каша-маш оланҥан

Интернет хуват «Тохтур эвалт иньщаслум» немпи вер вантты рахл. Там карты кел кашаң лапат хатл мэр халум пүш рөпитл: понедельник, вторник па четверг.

Муй па́та шимаш верлэщатлы. Ләдн округевн вәлты кашаң хуят самл оланҥан мулты мосты ут уша ат верас. Там вер ван хатлуп тылащ оланмит хатлан тывас.

Там вудаң вер там

атум коронавирус каша-маш тывум пурайн шеңк мосл. Ши мэр «горячая линия» тахия 38 ханнехэ карты кел хуват путартсат. Тохтурат пида путартты юпийн 14 хуят пәльница вантты па́та вохсыт. И хуята

сора кеши операция версы.

Шимаш нәтты вер ал ханнехуятат па́та вән унтас тәл.

Здравоохранения
Департамент айкел
ханты ясаңа тулмаштас:
Надежда Вах



80 ола йис

Ван хатлуп тылащ 5-мит хатлан Нижневартовской район Корлики кәртәң ими Мария Гавриловна Хохлянкина (Прасина) 80 тада йис, мүн лүвела ар хошум ясаң китлүв.

Ши тумпи Югра мүвев сема питум хатл вүш эвалт 90 ол постаты па́та М.Г. Хохлянкина ар ям ясаң луплүв. Вантэ, лүв ар ол округев па́та тарма па вещьката рөпитас. Ям арат ол ай январемат вәндтылащ, ши юпийн хатл мэр ай январемат вантман тайс, щалта рүтьщаты манты пура венты ар ол хатл мэр ай январемат тайты хот кәщая вәс.

Ешак Мария Гавриловна, нәптән 80-ола ювемас, ши тумпи округев 90 тада йис, кат вән еманхатланҥан пида! Мүн, «Ханты ясаң» па «Луима сэрипос» гәзетайнанан рөпитты ех, там ханты имия ар хошум ясаңат луплүв. Тадаң еш, тадаң күр, хув йис, хув нәпат уяңа-пищәңа хоттел ехлан пида вәда, елды щиты ши апраңа вәда!

Югра мұвн верум утат

Мүн округев 90 ола ювум па́та еманхатла дәщатум верат күтн ван хатлуп тылащ 10-13-митн онлайн-пищ мухты верум «Югорской мұв пурмасат па деты утат» ванлгупсы вәс.

Там тахийн Югра 21 муниципальной мұват эвалт ех акумсат. Иса верман 221 ванлгаты лапка щир тахи вәс.

Ши арат тахет эвалт мир тыв юхатсат, щит дөтут муй па пурмас верты ех. Тамаш вер там даварт олэвн мет мосл. Ехн уша ат верла, муй тахийн па муйсар пурмас лүв верад па муй мира тыныты питл.

Там тахийн вера арсыр дөтутат па пурмасат вәсат, щит еплаңа верум нюхи, еплаң хул, вәнт воньщумутат, воньщумут эвалт верум мавәң дөтут, юнтты утат па па сыр-сыр утат.

Олаң хатл «Югра хуца верум утат» немн пунса. Там хатл онлайн-пищ мухты ех актасат па лыв верум дөтутлаң па пурмаслаң ванлгасат, лыв верла оланҥан ушаң щира путартсат. Тамаш путрупсат там йисн мослат, ләдн ех нумас мүн мұвев пәда кератты. Югра сыстам па дащкам мұв харн енумты дөтутат яма дөтдайт, па мұвата па тәдыт.



Ванлгупсы пурайн

Кимат хатл – щит «Ям киньща ям!» фестиваль-касупсы Югра муниципальной мұват күтн. Щата касупсы вантты па ши вератн сащтайты ех мет ям вош пирилат. Лыв ар щира ши вер ванлгат па мет ям дөтут муй па пурмас пирилат. Мұвев хуца тывум верат, рүщ щирн бренд, там утат мет яма верты мосл там вәлупсы щира па йис верат щира мөстуман.

Хәдмит, юхи хашум хатлан, там фестиваль-касупсийн нух питум ех мойлупсийн масыйт. Там олн нух питсат:

«Рыбокомбинат Ханты-Мансийский» ям хул па ям дөтут хул эвалт вертәл па́та; оса ай вошн рөпитты ханнехэ А.А. Пушкарев, ям нюхи па нюхи эвалт ям дөтут вертәл па́та; хәдмит та́хия питас «Югорские традиции» немуп тахи, вәнт воньщумут мава вертәл па́та; ши юпийн мойлупсийн масы «Охтеурская звероферма», лыв питы вой, вурты вой енмәлдәт па ши пунәң сухат эвалт пурмасат ентләт.

Путар ханшас:
Пётр Молданов

Путар ханшас:
Людмила Гурьева



Ай пушхиет рэт ясәңа вәнлтәл

Нявремәт вәнлтәты не Альбина Митрофановна Кулешова Сүмәтвош район Ләв кәртән вәл па рәпитл.

Лүв вән вухаль семьяйн 1963-мит одн вән кер тыдәщ 7-митн Ләв кәртән сема питәс, щәта енмәс. Аңкел-ащел – Митрофан Ильич па Ирина Алексеевна Сайнаховнән – лапәт няврем енмәлсәңән. Ащел хот омәсты хәя вәс, хүл велпәсләс. Аңкел вухсарәт енмәлты хотн детут кавәртты неңа рәпитәс. Щиты Альбина Митрофановна ай пура олдал олаңән путәртәс:



▲ А.М. Кулешова. Н. Рагимова верум хур

» Мүң ай пурайн камн ар юнтсүв, тәлн духн сәмәңа хәтәтәлсүв. Ма Ульяна Филипповна Москвинайн вухаль щирн якты вәнлтәсыюм, щити пура вүш эвәлт ин вәнты вухаль якәт яклум. Нәмлем, и пүш ая вәдмемн Тюенне воша фестиваләя йәңхсум, ух неңева Любовь Михайловна Штаткина вәс. Мүң кимит тәхия питсүв. Любовь Михайловна «баян» немпи утн нарәсәс, мүң яксүв. Интәм округев әмәңхәтлән, Вурна хәтлән етнхотәт ләщәтлүв, щәта вухаль щирн яклүв.

Альбина Митрофановна Ләв кәртән ашкола етшуптәс, щәлта нявремәт хәтл мәр лавәлты хотн 13 ол мәр няня рәпитәс. Емвошн ЮГУ пүншсы, лүв щәта заочноя вәнлтыдәс, 2007-мит одн етшуптәслә, вухаль ясәңа вәнлтәты

неңа йис.

Мосл лупты, тәм вухаль ими 2002-мит ол вүш эвәлт Ләв кәртәң нявремәт вухаль ясәңа вәнлтәл. Садикн ай пушхиет вухаль щирн арсыр ясәңәт путәртты вәнлтәлүйт.

» Ма урокәт юнтупсы щирн тәлум. Вухаль моньщәт хүват, тәта нявремәт вәнлт войт, хот войт, воньшумутәт, хүләт олаңән ясәңәт уша павәтләт. Вән нявремәт лапәт мәр кәт пүш хәлумъяң минута хүват вәнлтәлум, айшәк – и пүш хәс минута мәр. Ма вухаль әрнәсн лыв жушела юхтыйдлум. Пушхиет пәта ищи әрнәсәт әнтсүв, әмәңхәтләт пурайн лывела дәмәлтәлдүв. Тәта арсыр мир нявремәт вухаль ясәңа вәнлтәлүйт. Мосл лупты, сыры оләтн

вәнлтәлум пушхиет сорашәк рәт ясәңәт уша пунсәт, интәм еша лавәртшәк. Ма щиремн, сырышәк юлн аңкидал муй ащидал, мосәң, рәт ясәңән путәртсәт, интәм – ән путәртләт. Нявремәт әмшә уроклама юхәтләт. Вухаль якәт якты дывты ищи вәнлтәлум, – лупәс А.М. Кулешова.

Щити тумпи Альбина Митрофановна ашколайн внеурочноя щирн нявремәт пида рәпитл. Лүв сәк кәрәтты, вухаль щирн әнтәсты вәнлтәл. Лупл, хуты айтәлдн әнтәсты вер сәмәңа тәйл. Лүв вантәс, хутыса аңкел әнтәсәс, щиты щити интәм әнтәл. Лүв тәса түтшәң, намәт верты хошл па щити вера пушхиет вәнлтәл.

Рәт вош олаңән А.М. Кулешова щиты путәртәс:



» Мүң вошевн 900 мулдас хәннехә вәл, тәп сыры оләтн аршәк вәс. Ашколайн 156 няврем вәнлтәйл. Сыры вошевн велум хүл йәха ақәтты тәхи вәс, ар хуят щәта рәпитсәт. Щәлта щит ләп тәхәрсы. Тәп интәм Александр Игоревич Голошубин общинайл тәта рәпитл. Дыв хүл эвәлт арсыр епләң летутәт ләщәтләт, щити тумпи нянь, ай нянят, хүләң па воньшумутәң нянят верләт, лапкәйн тыныләт. Ма щиремн, шеңк йәм, хуты вошевн щимәщ тәхи вәл.

Альбина Митрофановна икел пида кәт эви енмәлсәңән, лын Емвошн вәлләңән па рәпитләнән, семьяңа йисәңән, пушхиеләл енмәлдәт. И эви Юлия Гурбанова шәкащты нявремәт енмәлты хотн рәпитл, па эви – Ольга Иманова – пушхиетхәтл мәр тәйты хотн.

Ма ләңхалум Альбина Митрофановна йәм ясәңәт китты, хотәң әхләл пида уяңа, пишәңа, тәлаңа па йәма ат вәлләт!

Путәр хәншәс:
Надежда Рагимова



Воньщумутӓт лэщӓттӓ пӓтӓ йилуп вӓн хот йит верлӓ

АО «Рыбокомбинат Ханты-Мансийский» мӓң округев па па мӓв луваттӓйн немл сӓщл. Еплӓң, йм хӓлӓт верты па тыныты пӓтӓ сӓщл. Тӓтӓ рӓпитты ӓх мӓң юханлӓв па дорлӓв хӓлӓт эвӓлт сыр-сыр еплӓң летутӓт верлӓт. Щи тумпи па щорас хӓл тыв тӓтъялы. Щорас хӓл эвӓлт ищи летут кавӓртлӓт.

Иса лӓңӓттӓ ки, хӓлумьянӓкем арсыр летут хӓл эвӓлт верты пӓклӓт, мира мет мос-ты хӓл – щит пӓндшум хӓл. Каврум кӓрн муй пӓндшда муй па потма щимӓщ хӓл верлӓ, иса йма лӓтлӓ. Тӓтӓ рӓпит-ты ӓх сот киньща ар тонна хӓл кашӓн ол тыв тӓлӓт, летута верлӓт па ӓха тынылӓт. Тӓм мӓнум олӓвн иса 170 тонна хӓл тыв тӓтъясы.

ЩИ кӓш ар хӓл тӓм ӓх тыв тӓлӓт па летут щира лӓщӓтлӓт, тӓп хӓл мултаса дыв па летут па верлӓт. Тӓм олӓтн ры-бокомбинат ӓх йилуп щира летут верты пӓтӓ йилуп пурмӓсӓт дӓтсӓт. Йилуп щирн верум ле-тутӓт мир йма лӓтлӓт, щипӓтӓ ар тӓмӓщ еплӓң летут верты мосл.

Па одн йилуп вӓн хот йит лӓщӓтлӓт, щӓтӓ мӓң мӓвев воньщумутӓт па тулхӓт сыр-сыр летута верты питлӓт. Муйсӓр карты шӓп пурмӓсӓт мослӓт щипӓтӓ, иса утӓт лӓтмӓн вӓллӓт. Тӓп ин щипӓтӓ карты шӓпӓт йха ӓкӓтты па рӓпиттӓл пӓтӓ лӓщӓтты мосл.

Кӓща юкана вӓлты хӓ Виктор Данилецкий пу-тӓртум щирн, тӓм ӓх и хот йит тӓйсӓт, мӓтӓ тӓ-хийн воньщумутӓт эвӓлт летут версӓт, тӓп щит вера шимл. Югра мӓв ӓха аршӓк тӓмӓщ летут мосл. Щипӓтӓ пӓтӓ щипӓтӓ йилуп карты

шӓп пурмӓсӓт дӓтсӓт, йилуп хот йит версӓт.

Тӓм йилуп хот йит хуща 150 тонна вонь-щумут кашӓн ол потӓл-тӓты муй па кавӓртты питлӓт. Мет сыры дыв мӓң мӓвев воньщумутӓт тыв тӓты питлӓт, щит ӓхум воньщумут, хумӓс-вӓл, сӓвупсы, тулхӓт па тыв вӓты питлӓт.

Тыв щипӓтӓ воньщуму-тӓт тӓдӓйт, тӓх утӓт имухты потӓлтӓлӓйт, па утӓт эвӓлт мав юкан еплӓң летут верлӓт. Тӓм рыбокомбинатн воньщумутӓт шоколада пунты па питлӓйт, щипӓтӓ летут верты пӓтӓ карты пурмӓсӓт па дӓтсӓт.

» Мӓң щит сӓмӓңа рӓпитты питлӓв, муй вӓн тохтурӓт нормайт хӓншлӓт, муй дыв луплӓт, иса щипӓтӓ верӓт лӓщӓтлӓв, – путӓртӓс Виктор Викторович.

Воньщумутӓт округ луват эвӓлт тыв тӓты питлӓйт. Увӓс ӓх эвӓлт па лӓтты питлӓт, щит дыведа йм нӓтупсы питл, ӓша вух ӓша павӓтлӓт.

Тӓм верӓт пӓтӓ округ луваттӓвн воньщумутӓт лӓтты хотӓт лӓщӓтлӓйт, па тыв Ёмвоша тӓты вер па лӓщӓтлӓ. Тӓтӓ рӓпит-ты ӓх ищи воньщуму-тӓт ӓкӓтты питлӓт.



Хӓл пундшӓлӓт



Хӓл эвӓлт верум летут. Л. Теткина верум хурӓн

Тӓм вер ки лӓщӓтлӓ, рӓпитты ӓх арашӓк йил, итӓх хуятӓт вошн рӓпитты питлӓт, итӓх хӓннӓхӓйт округ луват-тӓйн воньщумутӓт мир эвӓлт лӓтман рӓпитты питлӓт.

Тӓм йм вер лӓщӓтты рыбокомбината Ёмвош кӓща ӓх нӓтлӓт, дыв хуты тӓм рӓпата тӓхийн

акционера вӓллӓт, дыв вухлӓд тыв пундӓт.

Верты летутӓл АО «Рыбокомбинат Ханты-Мансийский» арӓл пелӓк мӓң мӓвевн тыныты питл. Итӓх летутӓт па мӓвӓтӓ тыныты питлӓт.

Путӓр хӓншӓс:
Пӓтр Молданов



Нуви сәңхум мұв вәлупсы олаңан

Тәм ванән мұң Нуви сәңхум мұв кәща эвәлт ай кәртәт вәлупсы олаңан иньщәссүв, юхды социальной верәт әхтыйн кәща дәңкәр не Наталья Сокол щимәщ ай павтәс.

Нуви сәңхум район мұвев-йиңкев 41,6 щурәс арат верста хұваттыйн вәл. Ёмвош округ па мұвәт киньща щи районән нәл пұша шимл мир вәл.

Нуви сәңхум вош Эвәлт Тәрум Лор вош мет хұв тәхийн омәсл. Тухлән хопн щив 233 верста мәнты мосл. Вүтвош кәрте вәнта ищи хопн 146 верста арат. Поднавәт вәнта 40 верста тухлән хопн, тәл әш хұват – 56 верста, дүң пурайн Ас хұват 84 верста мир йәңхәл. Ваньщавәт кәрте вәнта тухлән хопн ки мәнты, 67 верста питл, йиңк хұват 156 верста дүңәтлди. Паштәр кәрте вәнта тухлән хопн 62 верста мәнты рәхл. Түкьякәң кәрте 126 верста вүшн омәсл, щит йиңк хұват мәнты ки, тухлән хопн 50 верста питл.

**Мир
йәңхты-мәнты
вер олаңан**

Сүсн-тәлн па тови-дүңән, хән тәл әш әнтәм па йиңк хұват йәңхты хулна ән рәхл, Вүтвош, Тәрум Лор вош, Поднавәт, Түкьякәң, Паштәр па Ваньщавәт кәртәт вәнта «МИ-8» немпи тухлән хоп йәңхәл.

Нуви сәңхум вош эвәлт Вүтвош – Тәрум Лор вош – Касум вош мухты па Нуви сәңхум воша юхды олмакәшәң дапәтн ипұш йәңхты-мәнты щир вәл.

Щәлдта Нуви сәңхум вош эвәлт Поднавәт – Түкьякәң – Паштәр –

Поднавәт – Ваньщавәт кәртәт мухты па юхды Нуви сәңхум воша сүс-тәлн па тови-дүңән ищиты кашәң дапәтн ипұш йәңхты-мәнты вер вәл.

**Летутәт па
пурмәсәт мосты
пурайн тәлди**

Нуви сәңхум мұвн вәлты кәртәт вәнта летутәт па сыр-сыр мосты пурмәсәт ивлапа па мосты пурайн телыева тәлди.

**Тәл әңк әш ил питтыйн
Вүтвош, Тәрум Лор вош,
Поднавәт, Түкьякәң,
Паштәр па Ваньщавәт
кәртәтн вәлты мир
пәта летутәт па арсы
пурмәсәт ищиты «МИ-8»
немпи тухлән хопн
тәлди.**

Щәлдта муйкем мосл, иса пурайн вохты непек хәншты рәхл, ән тәрумты пурмәсәт муй летутәт па тәлди. Дүң пурайн щитәт йиңк хұват йәңхты тутәң хопәтн мушатты рәхл.

2020-мит одн сырышәк поступсы щирн Ваньщавәт кәрт котельной хот 350 арат тонна лавум тәсы. Щит нюр 100 % сырыя дәшәтум вер. Щәлдта тәм сүсн лыпәт хойты тыләщн Нуви сәңхум мұв кәщәйт хотәт хошмәлты, нуви тūt вүщитты, каврум па потум йиңк мәты верәт

тәты тәхет ймсыева нух вантсәт. Щиты уша йис, хуты тәм тәхет 2020-2021-мит олаңәнән рәпитты щира тәса дәщәтман вәлдәт.

**Культура па
вәндтәты
верәт олаңан**

Нуви сәңхум мұв Ваньщавәт па Поднавәт кәртәнән әшколайәнән ищиты йма нух вантсыйәнән, немәлт ювра вер ән шиваләсы, щирн елды 2020-2021-мит олаңәнән рәпитты рәхл.

Щи тумпийн Паштәр, Түкьякәң, Тәрум Лор вош, Вүтвош па Ваньщавәт кәртәтн культура хотәт рәпитләт. Кашәң тәхи хошмәлты щира тūtтәюх сопас тәсы. Ваньщавәт кәртән па йилуп центральной хошмәлты ут версы.

Мир ймәлты хотәта ищи тūtтәюх сопас вәл. Участковой пәльницәйтн хошмәлты верәт ищи тәса дәщәтсыйт.

**Йилуп
коронавирус
мәш олаңан**

Нуви сәңхум мұвн йилуп коронавирүс мәшн шимл хәннехә мәшитл.

**Округ муниципальной
22 тәхи күтн щитл 21
тәхийн вәл. Югра мұв
кәща партупсы щирн,
COVID-19 немпи пәлтәп
кәшийн ән мәшитты**

**щира муй мосл, иса тәса
дәщәтман вәл.**

Пуртәнәт тыныты тәхийн мосты пурмәсәт иса пурайн дәтты рәхл. Щәлдта коронавирүс мәшн ән мәшитты пәта венш щәшкан сухәт па па немасыя утәт дәтты ищи иса пурайн рәхл. Щитәт 1, 3, 5, 10 па 50 арат вүты щир вәл. И щимәщуттын – 15 шойт.

Верхнеказымской, Сорум, Сосновка па Лыхма кәртәтн мир ймәлты тәхет рәпитләт, Поднавәтн па Касумн – участковой пәльницәйәнән, Ваньщавәт, Түкьякәң, Паштәр, Вүтвош, Тәрум Лор вошн – фельдшерско-акушерской тәхетн леккәртәт кәртәң мир лекшитләт.

**2014-мит одн мир ймәлты
па лекшитты хотәт
йилпатсыйт, щирн тәта
муй мосл, иса вәл.**

Кашәң дүңән Нуви сәңхум мұв хұв тәхийн омәсты кәртәт вәнта «Николай Пирогов» немпи йиңкәң пәльницә юхәтл. Щирн кәртәң мир тәм хопн ймәлты па лекшитты щир ищи тәйл.

Нуви сәңхум район хұват социальной верәт вантты кәща дәңкәр не Наталья Сокол хәншум айкеләт хәнты ясаңа тулмащтәс:

Ирина Самсонова



АЙТЕДН НЯВРЕМ СӘМҢА ТҰЙТЫ МОСД...

Щиты лупас Ёмвошаң технолого-педагогической колледжән айлат ёх 41 ол вэндтаты юрн ими Зоя Степановна Окоэтто. Тәмхәтл ма лүв олғалн хәншты ләнхалум.

Хәнты Ёмвоша юхәт-мемн па Нижневартовской пединститут Ёмвошаң филиал хуца вэндтыйлды олңитмемн (щит педучилище хуца вәс) ма Окоэтто опрашнем хәлсум. Имухты уша версум, щит юрн хуят, мәнема әмша йис. Вантә, ма 9 ол Ямальской район Сә-Яха кәртән вәсум па щәта ашкола етшуптәсум. Щәта ма пилема юрн эвет-пухәт вэндтыйдсәт, ар хуят Окоэтто опрашнем тәйсәт.

Интәм йилдуп коронавирус мәш пәта вәна пелка ювум ёх онлайн щирн рәпитләт, Зоя Степановна ищи щиты айлат ёх вэндтәл. Вәйтантайдты ән веритлумн, щирнмәлүвәда интернет хуца пицца хәншсум, лүв вәлупсәл олғәнән иньщәссум.

Тәм юрн ими вүлән хоттел ёх хуца сема питмәл. Данил Лаптандер аңщәсел Приуральской нөрүм мұв хұват вұды тәщел пида касдәс. Ямальской нөрүм хұваттын касәлман лүв Аркана Хороля хурасәң ими шивәдәс, мой версәңән, яха щи вәлты питсәңән. Дыв юрн хотәдн хәт эви па хәлум пух сема питсәт.

» *Щи семьяйн ма Мария аңкем – мет вән эвия вәс. Вәна ювмәлн Степан Окоэтто Ямальской нөрүм мұвәң хәя имия мәсы. Ащәм олғәнән лупты ки, лүв вән семьяйн хәт пух күтн*

хәлмита вәс. Теамзи Окоэтто щәтьщәщем – вән щәртән икия вәс. Аңкем-ащәм шўняңа вәсәңән. Мет сыры Андрей пухл, ма яём, сема питәс. Тәп кәт ол мухты вән шәк тывәс – ащәм район вош эвәлт вүлән ёха тывәщ вух тәс. Әшпәнт күтн лүв хуцәда хорахщәт нәпәтсәт, вухдал вүсьйт па лүв вәлсы. Щиты ма ащәм ән па вантсем. Щи юпийн ешавәс ма сема щи питсум. Әхәт юрн мир щирн аңкема мосәс ащәм апщи хәя икия мәнты, тәп лүв ән ләнхас. Щирн әхәт аңкем ма пилема аңкаңкем-аңщәщем хуца вәлты кердәс, Андрей яём щәщәм-щәтьщәщем хуца хәщәс. Вантә, дывәла вүды тәщел давәлты нәтты мосәс, елды Андрей яём щи вүды тәщ давләс, – нәмәлмәс Зоя Степановна.

Ики такды хәшум Аркана имие тарма рәпитәс, хұд па вой вәлпәсдәс, атәлт няд няврем енмәлтәс, аңкаңкәла нәтәс. Интәм дыв семьяел эвәлт тәп кәт хуят хәщәс, щит Зоя па Дарья апщел, лүв вән тохтура рәпитл.

Әхәт Аркана имие Василий икия мәсы. Зоя Степановна ясәл щирн, йивләңл – верән, сәмән, нумсәң хәя вәс.

Лапәт ола ювмәлн Зоя ашколая мәнәс. Олғән пурайн лүвәла еша давәртшәк вәс, вантә, лүв рүщ ясәң ән тәйс. Лүв Щучье, Белоярск па



▲ З.С. Окоэтто вэндтаты эвидал пила

Аксарка кәртәтн вәндтывәс. Зоя эвие математика, геометрия, физика, химия, рүщ ясәң па литература урокәт мосман тәйс.

» *Вәндтаты ёхдам сәмәңа тәйсәдам. – лупас юрн ими. – Дыв пеләда вантмемн ма айтедн нумса юхәтсум – ищи вәндтаты неңа йиты. Сырышәк тохтура, юриста йиты нумәс тәйсум.*

Ашкола юпийн Зоя Окоэтто Ленинград вошн А.И. Герцен немуп пединститут етшуптәс. 1979-мит олн айлат непекәң юрн ими Ёмвоша педагогической училищә рәпитты китсы. Там пура вәнты З.С. Окоэтто «Дошкольное отделение» хуца хәтл мәр нявремәт тәйты ёх вәндтәл, хутыса айтедн пушхиет сәмәңа тәйты мосл, тәп щи юпийн дыв уяң хәннехуятәта йилдәт. Худыева вәндтум айлат ёхдал нәмман тәйләдә, ин интернет хұват пицмайт хәншләт.

Рүтьщәты пурайн Зоя Степановна рәт Ямал мұвәда рәтләд хуца мойна яңхийл.

» *2018-мит олн ма Андрей яём пида вәйтантайдсум, әхәт ол лүв әнтәма йис, – путәртәл Зоя Степановна. – Щи тумпи ванкүтды Ольга, Нина, Надежда, Светлана Хороля асәвидам, апәлнеңдам пида вәйтантайдлум, дыв Пулңавәт вошн вәлдәт па рәпитләт. Ешавәл и апәлнеңема 83 ола, кимит апәлнеңема 90 ола щи йил.*

Ар ол айлат ёх вәндтуман З.С. Окоэтто «Преподаватель-методист», «Заслуженный работник образования Ханты-Мансийского автономного округа», «Ветеран труда» па ар ишәкты непекәт тәйл.

Зоя Степановна хушум ясәт китәс: «Йилдуп олн мұң Россия мұвев мир шўняңа, тумтака, ям нумәсн ат вәлдәт. Давәрт мәш йира ат мәнл. Кашәң хота уй па амәт ат юхәтләт. Айлат ёхлүв яма ат вәндтыйлдәт па елды Россия мұвәва унтас тўвман ат рәпитләт. Вантә, щит эвәлт мұң мұвев әрәңа па тәщәңа йил».

Путәр хәншәс:
Людмила Шульгина



Вэлтәл хұват пушхәт пида рәпитәс

Нина Петровна Неттина (Монина) Куги немпи көртән сема питәс, мәта ут Сартынья па Лэв көртән күтупн омәсл. Тәм ол вөйт лор тыләщн Нина Петровна 70 тәда йис.



▲ Нина Петровна Неттина (Монина).
Л. Теткина верум хур

Аңкел колхозн мис пәсты па ай мисәт тайты неңа рәпитәс, ащел вой-хүд велпәсләты хәя вәс. Ащел – Пётр Николаевич Монин, аңкел – Анна Никитична вухаль мир эвәлт вәсән. Лын әнтәма йисән. Аңкел 90 тәл луват вәс. Ащел хұвншәк әнтәма йис. Нина вән хоттел ех хуца сема питәс па енмәс, мет вән няврема вәс. Аңкел-ащел нивл няврем енмәлсәнән. Хәт хуят дыләнәт, хәлүм упи па хәлүм яй. Худыева семьяңәт, арсыр тәхетн вәлдәт, и хә апщел Тәкн вәл.

Нина Сартынья көртән енмәс, щәта ашколая яңхәс. Сыры олатн Сартынья вән көрта вәс. Рәт көртыел интам вәнты ши олүмн вантләлэ.

» Кәртыём сәмем вүшн вәл, щәта ай пура оллам мәнсәт, – лупәл Нина Петровна.

1967-мит одн хоттел ехдал Лэв көрта вәлты касәлсәт, айлат эвие па Ёмвоша педучилища тәхия вәндтәйлды мәнәс. 1971-мит одн щитл етшуптәслә па Тәк көрта рәпитты китсы. Сыры олатн айлат ех вәндтәйлды тәхиләл етшуптәтәл юпийн арсыр вошәта па көртәта рәпитты китыылдыт. Ши пурайн лүв 21 ода йис. Нина Тәк көртән рәпитты питәс. Щәта

Сергей Афанасьевич Неттин икел пида вәйтәнтәс. Хән 25 тәда йис, яха мәнсәнән. Лын икисәнән хәлүм няврем тәйлсәнән, кәт пухие па эвие. Пухәл китумтак Чечня мұвн служитман вәсән, ши пурайн щәта далъ тывиләс. Ин вән пухиян вәтшәслән, кимит пухән Тәк көртән вәл. Эвиян вән непекәна йис па ин Сүмәтвошн ай нявремәт пида рәпитл. Лүв иши семьяңа йис, кәт няврем тәйл. Вән эвиел 13 тәда йис, ай пушхәл хәлүм тәл луват.

Хән вән Алёша пухиян кәт тәл луват вәс, дыв Лэв мұва вәлты яңхсәт, щәта Нина Петровна интернат хуши рәпитәс. Нял тәл щәта вәсәт па әхәт юхды Тәка касәлсәт. Иикел аңки пирәщ вәс, атәлт вәлты щом ән тәйс, лүвела нәтты мосәс. Кашәң лүң лын лүв хуцела яңхсәнән, турн верты, түтүюх әкәтты нәтсәнән. Па щиты айлтыева нумәс версәнән Тәк көрта касәлты. Тәкн Собянинәт вәсәт, дыв Лэв воша вәлты мәнты вүтәщәсәт. Дыв эвәлтәда хот ләтсәт, кәртәпка хәрләлн, ошләлн пелтащсәт. Шивүш эвәлт Неттинәт Тәкн вәлты питсәт. Кимит пухән па эвиян тәта сема питсәнән па енүмсәнән.

Нина Петровна 15 ол садикән рәпитәс, нял тәл воспитателя па 11 ол садик көщә неңа. Ши юпийн хәс мултас ол интернатн нявремәт вантман вәс. Тәм ол 50 тәда йис, хән педучилищәйл етшуптәслә. Лүв иса 46 тәл мәр пушхәт пида рәпитәс.

» Тәмхәтл хәлүм ол мәнәс, хути ма пенсияйн рүтшуман вәлдүм, итәх пурайн рәпатая талдыом. Ин щәта айлат ех рәпитләт, шеңк щив ән вохантлююв. Сыры, хән мұң рәпитсүв, ванкүтлы пирәщ ехлүв, хуятат интернатн рәпитсәт, емәңхәтләта па етнхотәта вохәнтәйлсәлүв. Күтәвн пүтәртсүв, епләң нянь пида шайн яньщләтсүв, – нәмәлмәслә Нина Петровна.

Катра пурайн интернатн ар няврем вәс. Пәкәр, Устрём көртән эвәлт пушхәт ашколая тәтәлсәйт. Нявремәт мулды верты иса хошсәт. Түтүюх сәвәртсәт, хотхәрет люхитсәт, лоньщ хирсәт. Тәм йисн нявремәт рәпитты парты ән рәхл. Хотхәрләл люхәтлүйт, сухләл пәслүйт, нәмәлт верты ән мосл. Дыв нәмәлт верты ән хошләт, рәпитты ән ләнхаләт.

Катра интернат хот ай вәс, 46 няврем тәп кәт хот йитн вәсәт: и хот йитн эвет, кимит хот йитн пухәт. Ултытәхи әнтәрмәс, и улты тәхийн кәт хуятн улсәт. Күш ермәт вәс, тәп күтәлн түңширәңа, ләхсәңа вәсәт, вән хуятәта нәтсәт, ашколайн яма вәндтәйлсәт.

Йилуп интернат омсум юпийн нявремәт 2-3 хуят и хот йитн вәсәт. Тәп щәта шеңк ищки вәс, пушхәт тәлн ләмәтлюман улдйилсәт.

Ин Шайтанка көртәң нявремәт Тәк көрта вәндтәйлды юхтәйлдәт. Пәкәр па Устрём хуши шимл няврем хәщәс.

Тәмхәтл Нина Петровна икел пида рүтшуман вәлдәнән, вой ән тәйләнән. Хән нявремләл ара мәнсәт, мисәл нух вүсәл, дов иши веткем ода йис, ән тәйләтн. Кашәң ол, тәлн па лүңән, Лэв көрта рәтләл хуши мойңа яңхләңән. Сүмәтвоша касәлты нумәс тәйләнән. Ин щәта кеншәк вәлты, түтүюх сәвәртты, кәрәлты ән мосл.

Тәм лүң Нина Петровна 70 тәда йис. Вән вүща ясәнән хоттел китлем. Уяңа-пищәна хоттел ехдал пида ат вәл. Нявремләлн, хилыләлн амәтн ат тәлы. Найн-Вөртән лавәлман ат тәйлүйт. Тәлаң еш, тәлаң күр дывела луплүм!

Путәр хәншәс:
Надежда Вах



Югра мўвев, сема питум хәтл пида!

Ван хәтлуп тыләщ 10-митн Югра мўвев сема питум хәтл вўш эвәлт 90 од постәты питлўв. Щит Ёмвош округевн вәлды ёх па нявремәт пәта вән ёмәңхәтл. Югра мўвев – хурамәң, тащәң мўвиев.

Щи ёмәңхәтл постәты щира Игрим кәртән шәкащты па мөшәң нявремәт вәлды центр хуща арсыр ванлтупсәт, кәсупсәт ләщәтман вәсәт. «Югра – ма мўвев» немпи хурәң кина вантмев юпийн эвет-пухәт хәнты, вухәл па юрн мирәт йис вәлупсы оләңән уша версәт.

Нявремәт уша павәтсәт, муй щирн мўң йис Югра мўвев тывәс, муйсәр войт, тухлән войт, хўдәт, юхәт, воньшумутәт вәлдәт. Пушхиета мет әмщә вәс шуши мир моньщәт хәләнттты па амамәтщет уша верты.

Щи юпийн дыв моньщәт па амамәтщет оләңән хурәт хәншсәт. Округевн сема питум хәтл



▲ Л.С. Тихонова нявремәт пида юнтәл

пәта «Югра – ма мўвев» немпи хурәң ванлтупсы ләщәтман вәс.

Тәмхәтл шәкащты па мөшәң нявремәт шуши мир йис верәт оләңән уша павәтсәт – щит хутыса хўд сух ләщәттты па елды хирәт, кўр ләмәтсухәт па па утәт ёнтты.

Эвет па пухәт Югра мўвев вәтаң ёх оләңән

хәләнтсәт, муйсәр ям верәт дыв округевн пәта версәт. Хутыса йис телдн хәнты, вухәл па юрн мирәт хўд па вой велпәсләдәт, вўды тащ лавәлдәт, муйсәр хотәтн вәлдәт, муйсәр ләмәтсухәтн тәм пура вәнты йңхләт. «Сорни ёш» немпи ванлтупсыин хурамәң ләмәтсухәт,

тўрлопсәт па па утәт альман вәсәт.

Тәм йисн округевн мўв илпи питы вуй па газ нух талды, щирн мўвев тащәң, тәп шуши мир йис вәлупсы лавәлман па елды тўвман тәйдәт.

Нявремәта тәм ёмәңхәтл иса мәстәс, кашәң пушхия Югра мўвев оләңән ай киника мойләсы.

Елды эвет-пухәт пида «Игримской творчества центр» тәхия мәнлўв. Щәта дыв ищи ар әмәщ верәт оләңән уша павәтләт. Тәп щит елды питл. Ин, тынәң Югра мўвев, сема питум хәтлән пида!

Луиза Тихонова
хәншум айкел
хәнты ясаңа тулмащтәс:
Людмила Лонгорова

Увәс ёх вәнлтыйлтәл пәта вухн нәтләйт

Увәс ёх, щит хәнтәт, вухәлят па юрнәт ёх тәм йилуп оләв юхәттийн вухн нәттты питләйт. Щи вух мәты питла доньщ хўват йңхты ай машинаята вәнлтыйлтәл пәта па мотор ай хопн йңхты вәнлтыйлтәл пәта. Тәм йисн щи карты шөпәтн йңхты пәта непек тәйтты мосл. Щи непек ёша павәттты пәта ищи вәнлтыйлтты мосл.

» *Тәмәщ постановлення округ кәщайн ёш посн пунса, увәс мир вәлупсы вәнта щи вер Ас потты тыләщн 2021-мит одн юхәтл. Щи од эвәлт увәс ёх пищ тәйләт тәмәщ вух ёша павәттты, – путәртәс внутренией политика департамент хуща увәс ёх пида рәпитты не Екатерина Сапожникова.*

Ай машинайтән йңхты пәта кашәң хәннехә

пищ тәйл 19 щурәс шойт вух ёша павәттты, щи вухн лўв вәнлтыйлтты тәхел вўша юхәтл па вәнлтыйлтәл пәта сухуптәл. Мотор ай хопн йңхты ки ләңхәл, вәнлтыйлтәл пәта 22 щурәс шойт вухн мәды.

Тәмәщ нәтупсыин нәтләйт щи увәс мир, мәта ёх вәнт ай кәртәтн вәлдәт, муй па хәнты айшәк вошәтн хотәт тәйләт. Тәмәщ айшәк

вошәтн увәс ёх вәлдәт па йис верәтн рәпитләт, хўд велләт муй па вўды тәйләт, муй па па мулты йис верәтн ләщәтләт. Россия луваттийн увәс мир щимәщ ай вошәт тәйләт, щи вошәт худыева непекн хәншман вәлдәт.

Щи киньща па лупты мосл, мўң округевн йилпа верум непек щит госпрограма, хута хәншман па и сурт вәл,

вәнт кәртәтн вәлды мир пушкан ёша вўтәлдн дыведа па вәнлтыйлтты мосл, щи вер пәта ищи вух сухуптәты питла. Вәнлтыйлтты тынәл сухуптәды па воша йңхты тынәл ищи юхды мәды. Иса 10 щурәскем шойт вуха йил.

Людмила Теткина
хәншум айкел
хәнты ясаңа тулмащтәс:
Пётр Молданов



Ханты ёрнас

Россия мўв луватыйн ин ард пелак мир атум корона-вирус мөш пата юлта рэпитлэт. Тәм лаварт пурайн хулыева айлтыева елды вөлдүв.

Итэх хуятат юдн Ияклэт, арилэт па па верат лэщатлэт. Мўң па, ёнтасты ёх, ищи верды ан вөлдүв. Интернет хўват ванлтөлдүв шўкщаты верлүв. Щиты тәм ванан мўң интернет хўват «Ханты ёрнас» олаңан ёх иньщассүв, муй вўрн ёрнас арсыр тэхет ханты ясаңан альщадыйт. Щадта ёнтасты неңат ёрнас порәх, дытат, сапәллак па па тэхет ваньщасты вер онлайн щирн ванлтөсәт. Мет ям интернет хўват мўң хуцава пилтәшум хәннехәйт хулыева ёрнас ёнтты пищ уша версәт.

Ёрнас ваньщасты вер

Ханты ёрнас ёнтты кеша хөдум метра мултас сух мосл. Мет сыры ёрнас күтлуптәхи, щадта ил тәхи пәрма ваньщәсәдә. Ёрнас ил тәхи пәрма кәрщатгал 20-25 сантиметра кема верда. Щи юпийн ёрнас порәх ваньщәсәдә па веншәң пелкәдн имухты пелка тўңа мәншемәды тўр ов верты щира. Ёрнас порәх ваньщастыйн, мәта хуята порха пунман па



вантман верда. Елды дыт щира сух эвәтлә. Щадта хәңан пәтыя ёнтты няд сўнуп пўлңан ваньщәслайңан. Әхәт дыт ов па ёрнас сапәллак верда.

Мет юхи хәщты пурайн ёрнас яха әкәтлә па сәкәң ил тәхийн ёнтла. Щи тумпи вөйман тәйты мосл, арсыр хәнтәт ёрнаслад күтәдн еша ар хураспәт.

Ләңхәлум лупты, «Ханты ёрнас» ёнтты интернет хәрн Поднавәт вош эвәлт Людмила Васильевна Туполева, Ольга Матвеевна Сайнахова вәсңән. Амня вош эвәлт Людмила Николаевна Кондра-



Л.В. Туполева ёрнас ёнтты хәрн нух питәс

шина, Валентина Григорьевна Багишева, Татьяна Леонидовна Аликова па Ольга Леонидовна Тасьманова ёрнас ваньщасты вер олаңан путәртсәт. Ваньщавәт кәрт эвәлт Нина Васильевна Шабаршина онлайн щирн вәс.

Нуви сәңхум вош эвәлт интернет хўват Любовь Николаевна Бизина путәртсәдә, муй вўрн ёрнас арсыр тэхет ханты ясаңан альщадыйт.

Мет тәса ёрнас ваньщасты вер мира Поднавәт вошәң ими Людмила Васильевна Туполева путәртәс. Лүв «Ханты ёрнас» онлайн хәрн нух питәс. Ин нух питум хуятәв йилуп ёр-

нас ёнтәд пәта сухн мойлуптәсәв. Щи тумпи интернет хўват Октябрьской районан «Югра дылнуптәты» тәхи кәща ими Валентина Фанова хәнты ёрнас олаңан ай павтәс:

» *Тәмәщ ванлтупсы па ёнтәсты хәр шеңк әмәщ. Тәп ма нәмәсты щиремн, кашәң хуят имухты ёрнас сух ёша вўд па имухты нын лупты щирәнән питл ваньщасты. Щадта ёрнаслад етшәты юпийн ищи күтәвн ванлтәты мосл.*

Ирина Фирсова
хәншум айкел
хәнты ясаңа тулмащтәс:
Ульяна Молданова

Ханты ясанг
(Хантыйское слово)
№24 (3564), 24.12.2020

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, главный редактор – **Кондина Г.Р.**
Телефон (3467) 33-22-72

Заместитель главного редактора – **Вах Н.И.**
Телефон (3467) 33-24-02

Ответственный секретарь – **Рагимова Н.В.**
Телефон (3467) 33-24-02

Адрес редакции и издателя:

628011, г.Ханты-Мансийск,
ул.Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул.Маяковского, 14.

Индекссы 04393, 54393

Тираж **2166** экз.
Заказ **4559**
Цена свободная

Газета
зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по

Тюменской области,
ХМАО-Югре и ЯНАО.

Свидетельство о регистрации
ПИ №ТУ 72-00796
от 23 января 2013 г.

Мнение авторов
публикаций не
обязательно отражает
точку зрения
редакции.